

般若波羅蜜多心經

罽賓國三藏般若共利言等 譯



南無本師釋迦牟尼佛

說明

本繁體校正版《般若波羅蜜多心經》電子書，根據《高麗大藏經》宋續入藏經，第 1401 部，罽賓國三藏般若共利言等譯《般若波羅蜜多心經》原藏雕板印刷影印本校正。句讀僅作參考。特此說明。

仁慧草堂

二〇一七年十月

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結祥雲.
誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

般若波羅蜜多心經

罽賓國三藏般若共利言等 譯

如是我聞：一時，佛在王舍城耆闍崛山中，與大比丘衆及菩薩衆俱。

時，佛世尊卽入三昧，名廣大甚深。

爾時，衆中有菩薩摩訶薩，名觀自在，行深般若波羅蜜多時，照見五蘊皆空，離諸苦厄。

卽時，舍利弗承佛威力，合掌恭敬，白觀自在菩薩摩訶薩言：「善男子，若有欲學甚深般若波羅蜜多行者，云何修行？」如是問已。

爾時，觀自在菩薩摩訶薩告具壽舍利弗言：「舍利子，若善男子、善女人，行甚深般若波羅蜜多行時，應觀五蘊性空。舍利子，色不異空，空不異色，色卽是空，空卽是色，受、想、行、識亦復如是。舍利子，是諸法空相，不生不滅，不垢不淨，不增不減。是故，空中無色，無受、想、行、識，無眼、耳、鼻、舌、身、意，無色、聲、香、味、觸、法，無眼界乃至無意識界，無無明亦無無明盡，乃至無老死亦無老死盡，無苦集滅道，無智亦無得。

「以無所得故，菩提薩埵，依般若波羅蜜多

故，心無罣礙，無罣礙故，無有恐怖，遠離顛倒夢想，究竟涅槃。三世諸佛，依般若波羅蜜多故，得阿耨多羅三藐三菩提。

「故知般若波羅蜜多，是太神呪，是大明呪，是無上呪，是無等等呪，能除一切苦，真實不虛，故說般若波羅蜜多呪。」

卽說呪曰：

「 蘖諦蘖諦 波羅蘖諦 波羅僧蘖諦 菩提娑
〈蘇紇反〉婆訶 」

「如是，舍利弗，諸菩薩摩訶薩於甚深般若波羅蜜多行，應如是行。」如是說已。

卽時，世尊從廣大甚深三摩地起，讚觀自在菩薩摩訶薩言：「善哉！善哉！善男子，如是如是，如汝所說，甚深般若波羅蜜多行應如是行，如是行時，一切如來皆悉隨喜。」

爾時，世尊說是語已，具壽舍利弗大喜充遍，觀自在菩薩摩訶薩亦大歡喜。

時，彼衆會天、人、阿修羅、乾闥婆等，聞佛所說，皆大歡喜，信受奉行。

《般若波羅蜜多心經》卷終
乙巳歲高麗國大藏都監奉勅雕造

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙，和南
聖眾。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無觀世音菩薩摩訶薩 (合掌三稱)

迴向偈

(一編)

誦經功德殊勝行 無邊勝福皆迴向
 普願沉溺諸有情 速往無量光佛刹
 十方三世一切佛 一切菩薩摩訶薩
 摩訶般若波羅蜜

迴向偈

(一編)

願以此功德 莊嚴佛淨土
 上報四重恩 下濟三途苦
 若有見聞者 悉發菩提心
 盡此一報身 同生極樂國



此咒置經書中可滅誤跨之罪

南无护法韦驮尊天菩萨

